

Inatsisartut suleriaasianni § 33 naapertorlugu aalajangiiffigisassatut siunnersuut manna matumuuna Naalakkersuisunit saqqummiunneqarpoq.

Inatsisartut Ombudsmandiata 2021-mut ukiumoortumik nalunaarutaata Inatsisartunit tusaatissatut tiguneqarnissaanik Inatsisartut aalajangiiffigisassaattut siunnersuut.

(Inatsisinut Ataatsimiititaliaq)

Begrundelse:

Allaffissornikkut aqutsinerup inatsisini sinaakkusiussat iluanni kiisalu ingerlatsivinni inatsisitigut malittarisassat iluini ingerlanneqarnissaa pillugu Inatsisartut inatsisiliortutut Ombudsmandi nakkutilliisussat suliaqarnissaanik pisussaaffilerpaat. Taamaalilluni Ombudsmandi Inatsisartut Naalakkersuisunik nakkutilliinerannut sakkuuvoq, kisiannili aamma nunap innuttaasa eqqartuussiveqarnikkut illersugaanissaannut qulakkeerinnittuulluni. Ombudsmandi taamaalilluni tassaavoq *Inatsisartut innuttaasullu* ataatsimut Ombudsmandiat.

Inatsisartut Ombudsmandiat ukiut tamaasa Inatsisartunut nalunaarusiortarpoq, tassa ukiumi qaangiuttumi Ombudsmandip suliarisarsimasani nalunaarusiaralugit.

Ombudsmandip 2021-mut ukiumoortumik nalunaarusiaani – maannamut pisarnertut – suliat arlallit malittarisassatut tunngavimmi namminermi imaluunniit malittarisassat allaffissuutigineranni kukkunerit amigaatillu nalunaarutigineqarsimasut ilanngunneqarsimapput.

Ukiuni kingullerni ukiumoortumik nalunaarutit ajornartorsiutit pillugit, minnerunngitsumik oqartussaasunut Inatsisartunullu soqutiginaateqartut pillugit, allaaserisanik ataasiakkaanik aamma imaqartarsimapput.

Taamaalilluni innutaasut piginnaatitaaffitsigut isumannaatsuutinnissaat pisortatullu oqartussat suliaassaminnik suliarinnittarnissaat nukittorsartuarneqaqqullugu anguniagaqarnitsinni ukiumoortumik nalunaarusiaq sakkutut ikiuutitullu atorneqarsinnaavoq.

Ukiumoortumik nalunaarutip saqqummiunneqannginnerani Inatsisinut Ataatsimiititaliaq Ombudsmandimik ataatsimeeqateqarpoq. Ataatsimiinnermi tassani Inatsisartut Ombudsmandiata ukiumoortumik nalunaarusiaata imarisaasa ilai ataatsimiititaliamut immikkut soqutiginaatillit ataatsimiititaliamut paasissutissiissutigineqarput.

Ukiuni kingullerni kommunit suliaassanik suliaqartarnerat annertuumik unammilligassaqartarnera Ombudsmandip arlaleriarluni ilisimatitsissutigisarpa. Tamanna tunngavigalugu meeqqanik inissiisarneq angerlartitsisarnerlu pillugit 2021-mi Ombudsmandi kommunip suliaassanik suliarinnittarneranut misissuinerimik aallartitsivoq. Kommunini marlunni toqqakkani sulianik aalajangersimasunik amerlassusilinnik misissuineq ingerlanneqarpoq.¹

Innuttaasut tamakkiisumik taparserneqarsimannngikkaangata suliaassat suliarineqartarnerat pillugu inatsimmi aalajangersakkat malillugit allakkatigut aalajangiinnermut tunngavilersuinissamik kommunit naammassinninngittarnerat suli ajornartorsiutaasoq Ombudsmandip 2021-mi

¹ 2022-mi upernaakkut misissuineq naammassivoq.

nalunaarusiamini erseqqissaatigaa.

Aammattaaq Ombudsmandi isumaqarpoq kommunini ingerlatsiviit tamarluinnangajammik unammilligassaqarlutik ingerlasut, aammalu Ombudsmandi isumaqarluni ingerlatsinermut inatsisinut tunngatillugu malunnaatilimmik pitsanngoriartoqarneq ajortoq.

Suliassat suliarineqartarnerat pillugu inatsimmi malittarisassat pineqartut maanna ukiut 25-t sinnerlugit atuutereersimalersut, suliassallu suliarineqartarnerat pillugu inatsimmi malittarisassat pisariinnerpaat tunngaviunerpaallu ilagigaat Inatsisinut Ataatsimiititaliamit oqaatigineqassaaq. Taamaammat suli malittarisassanik taakkuninnga malinnissinnaanngitsunik kommuneqarnera pillugu isumakuluuteqarnissamut Inatsisinut Ataatsimiititaliaq tunngavissaqarpoq.

Peqatigitillugu Inatsisinut Ataatsimiititaliamit paasineqarpoq malittarisassanik taakkuninnga malinninneq innuttaasut ingerlatsinermik tatiginnissinnaanerat eqqarsaatigalugu annertuumik pingaaruteqarsinnaasoq: Allakkatigut aalajangiineq tunngavilersugaq aalajangersakkanut aalajangiinermut tunngaviusunut innersuussutitalik, aalajangiinerup innuttaasumut tapersiinniginneranut (imaluunniit tamakkiisumik tapersiinniginneranut) tunngaviusumik paasinninnissamut, aalajangiinerullu eqqortuuneranik paasiniaanissamut innuttaasumut periarfissiisoq.

Inatsisinut Ataatsimiititaliap isumaqatigiittup taamatut oqaaseqarluni Inatsisartut Ombudsmandiata 2021-mut nalunaarutaa pillugu siunnersuut Inatsisartunit tusaatissatut tiguneqartussanngorlugu saqqummiuppaa.

Ilanngulluguttaaq Inatsisinut Ataatsimiititaliaq Inatsisartut Ombudsmandiannut 2021-mi suliai pillugit qujassuteqassaaq.